

WATAPANA

Landscaping

Olga J. Buckley



www.olgajbuckley.com

Landscaping

Yen di susto e watapana, cu pa aña ta señor y doño di su mondi- awendia cura di familia Moderno- ta mira e monster gigante cu letter berde grandi skirbi riba dje ta acerca. Calafriu ta cera su curason, ora e corda e dia, cu 'sr. Moderno, bon bacha den higra di solo, cellular pega na horea, a baha di su Blazer. E shon aki a brasa Machi Doya, casi choca y a logra convenc'e, den un idioma cu Machi Doya no ta comprende pa bend'e e pida tereno , cu el a hereda di su antepasadonan, na prijs di baca flaco.Ni con Machi Doya a sefta su memoria e no por a saca afo, nieto di cua acto primo, e shon bistu manera minister, tabata.

E revolucion cu a lanta den mondi e tempo ey, tabata uno mudo. Cadushi, tuna, bushi, bringamosa y basora preto, baluartenen di nos naturalesa a hiba un lucha cu no por a competi cu e poder di e homber bon bacha, cellular pega na horea.

Desilusiona nan a mira Machi Doya sucumbi, despues di algun intento suak di su bisiñanan, pa convence Machi Doya pa wanta duro y mantene e tiki patrimonio cu tin ainda. Machi Doya inocentemente a cay den e trampa di 'no preocupa, tur cos ta bou di control', tanto p'e como pa e mondi. Awe Machi Doya ta benta, Dios sa den cua cas di anciano. Di mondi no por papia mes mas.

E watapana a mira su compañenan, un pa un, disparece sin misericordia bou di e patanan pisa di hero. Ta pa puro suerte of kisas negligencia di e homber riba e chubato, cu e watapana ta para aindo su so den e skina mas leu di e cura di e cas. Si no ta pasobra e pober mucha inocente ta den su Gloria ora e ta zoya bay bin riba e schommel, colga na un di su takinan, e lo a kraak e taki aki masha tempo lag'e bin abou cu schommel y tur.

'Ta cua calamidad ta spera mi atrobe?' e watapana ta pensa hostina.

'Landscaping, esta hipocrecia! Nan a rosa e mondi lag'e blo sunu caba, awor nan ta pretende di bin drecha paisahe yen di mata stranhero', e watapana ta cunsumi, sacudi y benta yen di bonchi abou.

E monster gigante cu letter grandi berde ta sigui su marcha. Un brasa colosal di hero cu tenglanan largo, ta baha un cargamento di mata straño pone den e cura.

Matanan, cu e watapana den tur su añanan di existencia, no a conoce. Matanan, cu nan a mima den e clima suave di otro pais y awor ta bin haci bunita den nos clima seco.

'Tss, drecha paisahe, ken por kere!' E watapana ta haya e pretexto aki masha fofo mes.

'Ta kico falta nos matanan anto? Duna nan hopi awa, gordura, vitamina y mima nan mescos cu e matanan importa y nan tambe por puha cu bunitesa. Ademas no tin mata stranhero cu por competi cu e elegancia natural di nos kibrahacha, cu su corona di mahestuoso di oro, cu e trinitaria, cu su buketnan di flor multicolor of cu e puresa di nos wayaca.'

E monster gigante cu letter berde no ta caba di dobla skina, cu un truck carga cu tera preto ta haci su entrada den cura di cas di famia Moderno.

'Mi Dios, esaki ta fin di mundo!' e watapana ta sclama. 'No ta basta habri porta pa intrusonan, hasta e tera ta importa! Increibel temp'i Machi Doya e tabata rasca tera fo'i bou di mi troncon pa bruha cu santo di rooi y planta mata. Den henter becindario no tabata tin un hofi mas bunita!'

E watapana ta sacudi su brasanan pa para e truck, pero esaki ta bira su atras p'e, tira su lomba patras y basha e cargamento preto na troncon di e watapanan.

'Laga nos pone e tera tanten bou di e watapana aki, ya e ta keda fresco. Ora cu e cura ta ful planta, nos mester bolbe bin cu e chubato pa ranca e watapana. E ta daña e paisahe y e luga ey ta net bon pa traha e "gazebo" cu Sr. Moderno tin planea pa completa e "landscaping"..."

E watapana no ta sigui scucha e combersacion di e dos hombernan riba e truck. E ta hala su brasanan cera p'e warda riba e chubato cu, pa su parti por wel di bin pa caba.
Olga Buckley (1997)